

Slavko FIJAČKO  
Društvo hrvatskih književnika

HORVATSKO ZVERIŠČE

(Franu Galoviću)

Osamdeset osem leti,  
prek trideseti jezer dana,  
več pri širovički kleti  
nema Galovića Frana.

Nešče ga je v Mačvi strelil,  
sad leži na Mirogoju;  
tijam v raj se je preselil,  
tam Horvati složno poju.

Ni več lve, ni več Ćure,  
nema Mile, nema Tina,  
nema Jože, niti Jure,  
nema Frica, Šegedina...

A mi, kaj vezdaj živimo,  
i po štagli se gledimo,  
kaj očemo? kam bežimo?  
Nam se ide šrek i mimo.

Kažemo si v žepu fige,  
kričimo si gadne reči,  
intrige su glavne brige,  
jen se drugom v lice beči...

Zato smo fort na margini,  
skorojevič nam se ruga,  
birokrat mecenu hini,  
a pesnik je njegov sluga.

Horvatsko nam sunce pada -  
kak bi Gustl Matoš rekел;  
več zijaju vrata Hada -  
i pak nas vrag vleče v pekel...

Se nas Fran gledi s kostanja,  
med nami čoveka išče;  
slika horvatskoga stanja,  
spodobna je na zverišče.